

林文忠公政書

丙集卷一三三

柳田文庫
文庫11
D 327
8



文庫 11
D 327
8

番務完竣赴任日期摺

奏為甘省番案現無應行會辦事宜欽遵

批諭前赴陝西巡撫新任謹將起程日期恭摺

奏報仰祈

聖鑒事竊臣仰荷

恩綸補授陝西巡撫仍留甘肅會同布彥泰達洪阿

籌辦番務當即具摺叩謝

天恩並請將會辦事竣於到任之前先行進京

陛見欽奉



48-1244

010190567490

硃批毋庸來京可赴任時卽赴新任欽此臣跪誦之
下敬繹再三旣不敢以瞻就下忱再行瀆請而
本任之職守與番務之情形尙須權其緩急查
本年沿邊各卡隘防守綦嚴並無野番竄入惟
上冬循化廳卡外之黑錯寺番賊劫殺洮州土
司一案官兵赴彼緝兇膽敢抗拒戕害不得不
懾以軍威是以數月以來臣未敢遽離甘省當
與督臣布彥泰等疊次
奏明添兵易將恪遵歷奉

諭旨攻其要害殲厥渠魁務使番族等知威知懼茲
經達洪阿帶兵勦辦將主令抗官之僧寺及恃
衆濟惡各番莊悉行焚燬賊番巢穴爲之一空
其逃至果岔地方希圖負隅爲固者復經痛加
勦擊斬獲甚多餘衆乞命投誠隨經收撫將田
地招良承種大兵凱撤回營計此案先後解到
番犯共有六十三名除西甯鎮總兵站住所獲
內有訊係株連之人業經隨時釋放外其餘均
已分別勸辦另行會摺具

奏又本年以來拏獲番賊漢奸多起亦就其情節
輕重會覈罪名分別

奏咨完結達洪阿於撤兵後經過省城與督_臣布

彥泰及_臣面述一切遂回青海本任布彥泰以

奏准親巡邊隘亦在料理起程_臣前由西甯回至

蘭州已閱四箇月現與布彥泰達洪阿訪詢輿

論咸謂向來番匪出沒靡定雖不敢保其久遠

無事而此時野番之懾伏邊隘之安恬實與去

歲情形判若霄壤_臣思近年番匪鴟張原因弁

兵怯懦所致卡隘幾同虛設既不能堵賊於未
來之先入山視爲畏途又不能擊賊於失事之
後卡內則有漢奸熟番爲之引路通信卡外則
有番僧巨寺爲之匿犯窩賊是以來去自如肆
無忌憚不獨民間疊遭劫掠卽戕官亦若泛常
不獨草肥始出逞兇卽寒冬亦多肆擾經此次
大加懲創之後番衆知喇嘛寺院不足恃爲護
符我兵知大礮擡槍實能遠攻克敵軍威旣振
賊膽自寒加以督_臣帶兵親往各卡周歷巡閱

新任提臣台湧不日即可到甘亦能力加整頓
臣現在別無應行會辦之事而陝省文闈伊邇
巡撫例應監臨所有科場事宜亦須先期督辦
免致臨事周章是以臣謹遵前奉

硃批可赴任時即赴新任定於六月二十四日由蘭
州起程除俟行至西安接受撫篆另行專摺
奏報外所有察看甘省現無會辦事宜謹遵
批諭赴任緣由理合繕摺具

奏伏乞

皇上聖鑒謹

奏

請將渭南縣余炳燾量加鼓勵摺

再陝省之渭南富平大荔蒲城一帶久爲刀匪
出沒徑途緣此數處回族最多素以爭鬪爲能
搶竊爲利與刀匪互相勾結勢燄益張攫財物
則彼此分贓聞緝拏則糾同抗拒有窩巢以爲
藏身之固有器械以爲抵禦之資不獨兵役避
其兇鋒卽州縣營員亦不免望而卻步雖訪知
著名惡黨亟應搜捕驅除而轉思惜費憚勞不
如省事又恐負嵎恃衆易致損威且卽破一巨

巢獲一大夥而又慮及在逃餘犯或設計報復
或捏控抵制其爲累者正多並又憚於于吏議
之嚴因起獲火器刀矛而轉咎其從前之失察
是畏累之心愈甚卽緝匪之勁愈鬆諱飾因循
漸至養癰貽患臣現將此等錮習剖析開導務
令極力破除州縣中果能緝捕認真有犯必獲
不獨寬其既往並當獎其微勞若仍存遷就私
心畏難粉飾必卽立加參劾以杜各屬效尤此
次渭南縣知縣余炳燾督率兵役親挈此案匪

徒計先後格殺擒獲三十餘名奪獲火器軍械
多件實能除暴安良不避艱險並於先事豫知
布置周密安詳故雖兵役多受槍傷而辦理尙
能妥速不致釀成巨患民間輿論咸謂除一禍
根若各州縣皆能似此認真匪類何從託足可
否將該縣余炳燾量加鼓勵俾州縣咸知激勸
之處出自

皇上逾格恩施謹附片陳

奏伏乞

聖鑒訓示謹

奏

臣等謹議銀錢出納陝省礙難改易摺
奏為遵
旨籌議銀錢出納事宜體察陝省情形據實具
奏仰祈
聖鑒事竊照前准部咨奉
上諭穆彰阿等奏遵旨會議御史劉良駒條奏銀錢
畫一章程一摺銀錢並重本係制用常經果能隨
時酌覈不使輕重相懸裕國便民兩有裨益未可
輒稱窒礙不思設法變通著該督撫等各就地方

籌議銀錢出納陝省礙難改易摺

旨籌議銀錢出納事宜體察陝省情形據實具

奏仰祈

聖鑒事竊照前准部咨奉

上諭穆彰阿等奏遵旨會議御史劉良駒條奏銀錢
畫一章程一摺銀錢並重本係制用常經果能隨
時酌覈不使輕重相懸裕國便民兩有裨益未可
輒稱窒礙不思設法變通著該督撫等各就地方

情形詳細體察悉心妥議具奏務使法立可以推行不致滋弊毋得任聽屬員巧爲推諉稍存畏難苟安之見僅以一奏塞責欽此又軍機大臣會同戶部議覆內閣侍讀學士朱嶠條奏貴錢濟銀一摺奉

旨依議欽此並抄錄各原奏咨行到陝當經前撫臣轉飭司道暨各府州酌覈籌議臣到任後復經諄飭細加體察設法變通不許畏難推諉去後茲據司道彙覈屬稟會議具詳前來臣思銀錢

相輔而行利散於民而權操自上果能廣用錢之路自足持銀價之平惟變通本以濟時而制宜首須因地查部議章程四條本以陝西列入陸路六省之內固已知其非比東南各省一葦可杭而仍議令查明有無內河水路原冀一處能通舟楫卽於一處先令試行無如陝省七府五直隸州所屬九十一廳州縣之內錯處於南北兩山者計已五十九處重巒疊嶂車轍尙不能通此外三十二處雖屬平原之地亦無內河

水路可達省垣是以行旅往來非車卽馱並有馱載亦不能通之處則須雇夫背負腳費愈繁此費若出諸官則恐滋虧空之端若取諸民又恐增派累之弊是陸路之難以運錢實係限於地勢似不能勉強而行也且陝省銀錢市價長落無常有時竟與別省迥異如本年七月內臣甫到西安省城每紋銀一兩可換制錢一千八百餘文迨至九十月間每兩僅換錢一千二百文不等較前兩月頓減錢五百餘文之多衆

人皆以爲詫異訪詢其故則僉稱歲歉糧貴之時銀價必然跌落其理亦不可解如果此後銀皆落價似亦相宜然又忽低忽昂不能豫料且當陝省銀賤之際鄰省銀價仍昂而未聞有市儈販錢來陝買銀以圖獲利者可見陸路運費太大不能取贏若以市儈所不能爲者責令有司爲之其勢自更不易查內閣侍讀學士朱嶠原奏請將各屬銀錢視省垣時價爲準今以陝省觀之卽有難以作準者如省城現在銀賤而

林文忠公政書 丙集卷一
各屬之銀偏貴則領錢而回者不能與該處銀價相敵州縣不甘賠累卽難強以遵行且缺分衝僻不同錢糧多寡亦異有此屬之所解而爲彼屬之所領者領錢之人非卽解錢之人稍有參差遂滋爭執似亦非上司所能強制若論常年稅課原可銀錢並收但查陝省額徵商筏稅以及地畜牙當鹽茶磨鐵各課每年共銀六萬八千五百餘兩內除鹽課項下支給西安將軍養廉銀一千六百兩外其餘皆應報部候撥此

正部議所云撥解之款應照舊徵銀不能改議者也以工程言之近年應修各工概因經費短絀奉文停止卽間有刻不可緩奏准辦理之工亦係爲數不多通年無幾或因本有息款始准支銷與其改用錢文仍不如加意撙節之爲有益也惟陝省留支項下有可以變通用錢之處如文武各官養廉公費並各屬額支夫馬工料及各關局額支收稅書役口食等款俱可搭放錢文查道光二十三年覆奏陝局減卯開鑄案

內卽已議准凡養廉等項每領銀一兩內搭錢一百文抵作銀一錢每年共搭錢三萬六百四十三串三百六文共扣回庫銀三萬六百四十三兩三錢六釐按季報部現仍遵行無異是變通用錢之議陝省所辦已在他省之先其未經搭錢者現扣六分平頭計每年扣銀亦在二萬兩以上若再加搭錢文則減平一項轉覺扣不如數且卽使此等款內再令減銀添錢亦不過杯水車薪於大局似仍無濟至兵餉項下未便

再搭錢文則前撫臣李星沅先已奏荷

恩俞自毋庸議當此權衡制用上厯

宵旰疇咨臣

但有一得之愚斷不敢存苟安之見惟

就陝局情形細加體察實有難以改易者亦有業已變通者應請仍循舊章庶免轉生窒礙所有遵

旨籌議緣由謹據實恭摺覆

奏是否有當伏乞

皇上聖鑒訓示謹

奏

酌籌平糶量撫極貧片

西安同州鳳翔乾州等府州屬本年夏秋被旱收成歉薄業經_臣將咸甯等廳州縣應納銀糧倉穀酌請分別緩徵

奏蒙

恩允在案惟此次受旱之區二麥多未播種卽其已種出土者亦因久不得雪未能穩固盤根來年生計所關難免人心惶恐是以_臣前經

奏明先擬酌辦平糶查西安等四府州屬現存常

平倉糧共有一百一十餘萬石向因久貯在倉恐致霉爛故有推陳易新存七出三之例每年冬春酌量出借秋後收納還倉今遭此歉年據各屬稟請推廣章程勿限存七出三之數多爲借給以期民食有資但臣細核情形竊以爲出借之例止宜行於常年若歉歲則須改出借爲平糶於貧民乃有實濟緣陝省常年出借惟擇素有恆產之戶秋後有糧收入者令其春借秋還若隨時買食之貧民則恐其力不能還不肯

輕爲借給此歷辦之情形也茲值歲歉價昂此等買食貧民正虞食貴亟須爲之調劑不應轉將倉貯糧食借與素有恆產之人然竟借給貧民又恐有借無還徒致積爲民欠故與其照案出借不如照例平糶之爲宜也第平糶有應嚴防之弊竇亦有應變通之章程如例載奸商牙蠹捏名零買囤積射利本應按律治罪然治之於捏買之後何如杜之於未買之先臣與司道熟商正值編查保甲之時卽責令地方官統將

戶口確切查明分晰註冊凡應准平糶之貧戶核其大小幾口填給印單一紙令其憑單買糧每一次准將五日之糧一併糶回隨於單內蓋戳仍交該戶收執爲下次買糧之據仍分別各鄉排日勻糶週而復始如此辦理可免擁擠之虞而固積射利之徒亦不能希圖冒混矣其章程有應變通者如出糶有額減價有數固應示以限制又糶價錢文應由州縣易銀先解司道存庫隨後發還買補亦屬層層稽核之道但辦

理若過於拘執恐吏胥轉得因緣爲奸查地方官惟在得人知該州縣本不可信卽不可令其辦荒果其可信則旣委其經手平糶應卽責其一手買還無論糧之多寡價之增減總以能發能收使原額倉糧顆粒無虧爲止似不必節節請示以及一解一還徒勞往返轉爲滋弊之端且該州縣果能經理有方則初處糶得價錢尙可齎向別處糧賤之區再行購買輾轡轉運所濟更多是倉糧祇能供一次平糶之需而轉運

更可收數次平糶之益其要歸於擇人妥辦而已至此外極窮之民以及老幼廢疾即使減價平糶彼亦無力買食其爲顛連困苦尤可矜憐國家經費有常何敢遽行議賑惟有官爲收養俾免餓殍在途現在西安省城收養者已有三四千人市廛悉皆清靜各屬亦令一體酌辦並勸有力之戶量出錢米各濟各邨使其受者知情予者見德則卹貧卽所以保富而地方亦藉獲安恬以期仰副

聖主軫卹窮黎之至意所有酌籌平糶及量撫極貧緣由理合附片陳明伏乞

聖鑒謹

奏

覆奏部議陝甘捐輸經費再行詳覈摺

奏爲陝甘捐輸經費遵照部議再行籌畫覈辦恭

摺奏祈

聖鑒事竊准戶部咨稱議奏陝甘捐輸番案經費應
准給予餘限兩月扣至二十七年二月底一律
截止所捐銀兩原爲番案而設擬令湊足七十
萬兩分貯陝甘兩省藩庫加謹封貯以資儲備
其所請提銀四十萬兩發商生息一節原因常
年設卡遊巡豫爲籌計但發商每年輸息亦祇

獲息四萬兩設遇急需而所發本銀難以剋期
收回似宜實存在庫提用較爲便易應令該督
撫等查照現議將該省緩急情形通盤籌畫詳
加酌核再行奏辦其十一月以後所收捐銀及
餘限內續收銀兩均應報部撥用藉資周轉所
有歸完減平銀六萬六千七百兩迅卽委員批
解部庫毋稍稽遲又附片奏稱陝西第三次捐
輸收銀六十餘萬兩除現經議令湊歸陝甘兩
省藩庫外計數儘有盈餘擬卽在此項內提銀

三十萬兩以充收買商米之用立即委員解赴
天津道庫交納毋稍遲誤等因具奏奉

旨依議欽此咨到臣等欽遵辦理除陝西省已委試
用同知雍載慶等三員各管解捐輸銀十萬兩
分作三起均已於正月起程赴天津道庫交納
不敢稍有稽遲外其議定以七十萬兩分貯陝
甘藩庫一節查甘省捐局三次奏報共收銀十
一萬一千八百餘兩除應解部歸完原借減平
銀數尙不敷存貯之數自應卽由陝省覈撥解

甘並陝西藩庫封貯之項均各專案報部仍照
臣等前摺所請遇有重大事宜必須專摺

奏明方准動用以重公項而備不虞惟現准部議
既令_臣等將緩急情形通盤籌畫詳加酌核再
行奏辦遵即往返熟商從長計議不敢僅顧目
前潦草塞責竊以番務爲甘省最累之端自古
至今不知辦過若干次數果有一勞永逸之法
前人早應絕其根株必不肯將就一時仍貽後
來之累無如該番衆等族類既不可勝數插帳

又並無定居且無恆業以資生但恃攘奪爲長
技捕一處則一處暫爲斂迹辦一年則一年僅
免鴟張如有關顧不到之時防範未周之地彼
卽狼奔豕突無惡不爲卽如前年鉅案叢生上
年賊蹤稍斂此中無他謬巧總惟嚴防卡隘勤
拏漢奸賊未來則分兵遊巡賊既至則合兵剿
擊雖不能盡期破獲究不敢稍任空虛然如此
辦理則須有常年額支之經費有臨事急需之
經費所謂臨事者如遇大股抗拒必須多用兵

威若上年剿辦黑錯寺之類卽部議所云存庫
提用較爲便易亦卽臣等前摺所云必須

奏明方准動用者是也若常年阨要防卡防河及
分派遊巡之弁兵欲其認真嚴守不敢躲避虛
報則不得不另給口分使之果腹有資始能勇
奮從事以是計之卽終年安然無事亦須二萬
兩上下方敷給發以無已之支發若取諸藩庫
封貯之項自然日見減少且該年之中又難保
無臨事亟需奏請動用之款則年復一年不久

卽歸烏有臣等苟但顧目前此數年內未必不

可敷衍而爲久遠之計似生息一項勢不可無
卽如前摺所請於捐項提出四十萬兩發商生

息經部臣核明每年祇可獲息四萬兩原係燭

照數計再不能斷有加多然若以二萬兩爲添
防及遊巡舟兵口食之需仍以二萬兩歸本則
二十年後本已歸足息仍長流較之全由封貯
款項支發日見消耗似爲久遠之圖查陝局捐
輸自第三起具

奏之後又有續收銀二十九萬餘兩豫計截至二月底止陸續呈捐者當復不少覈數總有盈餘合無仰懇

皇上天恩俯念邊境防番在在皆須設備所有_臣等前請提銀四十萬兩生息一項仍求

恩准辦理庶兩藩庫封貯之款可期永遠存留不至日久消耗實於邊務有裨現據兩省司道稟稱查近年陝甘商力亦甚疲乏或須將生息分數酌量減輕之處容_臣等察看各屬情形再行分

別核辦總期有裨公事無拂輿情其自十一月以後至餘限期內所收捐銀除發商生息外自應遵照部議全行報撥但查甘省地連關外每年所需兵餉四百餘萬悉由江浙豫東等省及長蘆兩淮撥解前來程途既遠陸運維艱若將捐輸條款抵解他省協甘之餉似可稍省輾轉解運之煩而他省應行解甘餉銀又可另爲就近挹注如此一轉移閒於

帑項並無出入盈縮而運費節省實多似一舉而

數善備焉臣等通盤籌畫彼此札商意見相同
是否有當謹合詞恭摺具

奏伏乞

皇上聖鑒謹

奏

覆奏漢回情形片

再臣在四川途次承准軍機大臣字寄道光二

十七年五月初二日奉

上諭李星沅密奏辦理回務體察情形等語據稱此
次剿辦雲州回匪揆度機要內回富而外回貧外
回強而內回弱與其濫殺而徒滋藉口不如密計
而先務攻心且邊郡不知有法由來已久莫如持
平執法俾漢回同體犯則重懲行保甲以清內匪
團練以禦外匪各等語著林則徐於到任後詳加

體察酌量情形悉心籌辦原片鈔給閱看另摺奏
回犯張富於投誠後隨往緬甯勸諭漢回旋被該
回匪逼令入夥嗣訊據犯供張富在雲州觀音閣
被矛戳傷身死旋據回寨繳到犯屍檢驗被傷處
所與訪獲該犯之母妻等所供相符現仍解省驗
訊辦理等語亦著林則徐詳細訪察張富果否被
矛致斃及屍傷犯供等是否確鑿萬不可輕信人
言遽以爲實總當設法研求務得實據詳悉覆奏
將此諭令知之欽此

臣跪誦再三並將

發下李星沅原片詳加閱看其所云漢回同體執法
持平與其濫殺而徒滋藉口不如密計而先務
攻心等語洵係熟察情形務求公允之論伏思
漢回構衅不過民與民讎迨至糾眾抗官則兵
不得不用然已疊經剿辦尤須永冀安恬前此
永昌之後緬甯又起緬甯之後雲州又起懲創
非不痛切而仍反覆無常總由人人以報復爲
心卽處處之猜疑易起加以游匪造言挑釁漢
回多爲所愚意欲藉以復仇而不知適以自害

彼則利其焚奪人已陷於敗亡此種匪徒最爲可惡前督臣李星沅及兼署督臣程爾采節次懲辦者業已不少猶恐潛蹤匿迹煽惑爲奸故外匪一日不除卽禍根一日不斷如何始能淨絕現臣與撫臣均在加意講求此時以軍務而言似善後特爲餘事而以清源而論則杜患正費深籌竊思漢回雖氣類各分而自

朝廷視之皆爲赤子但當別其爲良爲匪不必歧以爲漢爲回果能各擇其良以漢保回以回保

漢協力同心共驅外來游匪則所謂同體者非復虛言而所謂攻心者毋煩勁旅與李星沅前所密陳似相脗合惟臣甫經抵任一切未及週知容當體以虛心持以實力不敢以目前息事稍任名屬文武相率因循至張富一犯之死雖人言皆以爲實臣到滇所訪並無異辭而仰蒙諭令設法研求斷不敢遽行輕信竊思犯屬欲其生不欲其死或不免指僞爲眞而仇家欲其死不欲其生必不肯隨聲附和張富爲回中稔惡漢

民與之深仇積恨者實繁有徒臣現以審究漢
奸為由酌提人證暗查與張富仇恨最深者數
名俟提到向其窮詰庶幾水落石出真贗不致
混淆除再詳細研求務得實據另行覆

奏外謹先附片陳明伏祈

聖鑒謹

奏

審辦雲州等處漢回各匪摺

奏為審明前在雲州等處糾眾抗拒劫殺之漢回
各匪分別定擬並將情重之犯六名即行正法
以昭炯戒恭摺奏祈

聖鑒事竊照調任督臣李星沅片

奏飭據順甯文武在雲州之新村訪拏新興州外
回黑臉馬五等犯因其持械拒捕經兵役將黑
臉馬五馬滿大二犯格殺剖取首級生擒匪黨
郭望年張小老李春有馬庭汶馬富呂會原六

名飭解來省審辦迨臣程商采到任後復飭搜捕匪黨先後據稟拏獲回匪董老官漢匪范小黑二犯亦經具

奏在案嗣又獲范小黑之黨張小沅一名提同前獲各犯至省委員確審茲據審明議擬由藩臬兩司覆審招解前來臣等率同在省司道親提研鞫緣董老官係陝西渭南縣回民向在雲南雲龍州一帶小木營生郭望年卽郭老四又名郭老九係四川銅梁縣漢民先年移至雲南新

興州居住張小老係新興州漢民李春有係新興州回民馬庭汶卽馬老二馬富卽馬老四均係宜良昆明等縣回民呂會原係會澤縣漢民同在順甯縣屬傭工范小黑張小沅均係順甯縣漢民張小沅係范小黑妾張氏之姪道光二十六年十月初六日有回民黑臉馬五因在新興州地方與褚發榮張五公登等買米口角邀約張小老李春有並馬萬等前往毆打將張五公登等毆斃七命張小老李春有僅止在場助

勢並未傷人因聞差拏嚴緊黑臉馬五聲言回民張富等與伊素識現在雲州聚眾滋鬧起意邀郭望年並張小老李春有前往隨同燒搶郭望年等應允同行維時董老官亦聞雲州回民滋事因係同教起意前往幫助十一月十三日行至順甯縣屬狗街地方路遇回民馬老四張花嘴馬隴老蕭老二及不識姓名回民約一百五十餘人董老官訴述前情邀允同往沿途搶掠漢人村寨共四五家二十日兵練前往捕拏

董老官因同夥多由烏合不相認識令眾人各用白布包頭派馬隴老在左蕭老二在右伊與馬老四張花嘴居中各帶五十餘人分作三股迎敵當經兵練打敗連夜逃走其時殺傷該匪幾人不及查數二十四日逃至永平縣屬龍街地方兵練復往截拏董老官喝令眾人拒敵致殺練丁二人該犯同夥亦被殺死三十餘人其餘各自逃散十二月初八日黑臉馬五等途遇素識之馬庭汶馬富呂會原告知情由邀約人

夥馬庭汶等不允黑臉馬五等許給工錢令馬庭汶等背負行李馬庭汶等貪利允從偕抵雲州地方黑臉馬五等又令馬庭汶等挑水煮飯看守房屋十四日黑臉馬五與張富等帶同郭望年張小老李春有並不識姓名多人在觀音閣抗拒官兵張富被兵練戮傷身死郭望年張小老李春有亦各殺練丁一人十七二十一等日官兵疊次圍攻該匪等均在場隨同拒敵迨後敗回逃往各村寨遇便搶掠不記次數此董

老官及先經格殺之黑臉馬五等各自起意糾同夥匪拒殺練丁之情形也又漢民范小黑於二十六年十一月閒因聞雲州回民滋事與張小沅並村人張九和劉榮蔣小祥馬俊馬小二李小三張貴各自集練防堵十二月二十六日右甸街期范小黑因回民屢向漢民爭鬧起意乘回民趕街糾眾搶奪既可洩忿又可得贓使用途向張小沅等並伊姪范坤告知邀允入夥又令張小沅等轉糾王三楊耀春楊二聾子並

不識姓名五十餘人各執器械同往街上喊搶
回民攔阻被張九和等殺死十餘人張小沅亦
用矛戳傷朱萬春左脰左肋身死各搶錢米布
疋逃走是夜逃往保山縣屬猛庭回寨回民間
風逃避范小黑喊同眾人乘勢搶掠張九和等
殺死回民數人張小沅亦用矛戳傷不識姓名
回民左臀倒地匪夥王三乘勢砍落頭顱並有
回民馬聯超之家屬亦於是夜被匪戕害當經
兵練趕往圍拏將匪夥殺退各散二十七年三

月十一日經騰越明光隘土守備左大雄將范
小黑拏獲其子范小幅生糾邀張小沅與楊耀
春楊二聾子並不識姓名多人欲將范小黑劫
回左大雄帶練攔拏楊耀春楊二聾子各殺練
丁一人維時范小黑業已押解先行未被劫去
其匪夥亦被格殺三人惟右甸街及猛庭寨回
民被殺名數並被何人殺死因人多勢亂不及
看明此范小黑等糾眾搶殺及張小沅聽從奪
犯未成之情形也節經各地方文武先後稟報

前督^臣李星沅派委員弁帶領兵練剿捕業將首要各犯拏獲審明分別辦理具

奏一面札飭搜捕餘匪嗣據該管文武暨委員卸順甯縣知縣楊觀卸署順雲營參將劉思禮前赴新村訪拏除格殺黑臉馬五等割取首級外將郭望年等六名拏獲又在姚州赤額坪地方會同該州將董老官拏獲左大雄亦將范小黑解赴永昌旋又據署右甸經歷蔡踵武稟報拏獲張小沅一犯當因該犯等情罪重大均飭提

省審辦茲^臣等率屬提訊據各供認前情不諱查律載謀叛但共謀者不分首從皆斬又例載搶奪財物聚眾十人以上執持器械倚強肆掠果有兇暴眾著情事者照糧船水手之例分別首從定擬又糧船水手夥眾十人以上執持器械搶奪爲首照強盜律治罪又強盜已行但得財者斬又搶奪殺人者擬斬立決各等語此案董老官因聞雲州回民滋鬧起意糾眾往助搶掠村寨復兩次率眾拒敵致斃練丁二人郭望

年張小老李春有亦各隨同已死之黑臉馬五及張富等抗拒官兵各殺練丁一命均屬情同叛逆查張小老李春有尙有在新興州助勢毆斃張五公登等一案情罪較輕應歸此案從重擬結與董老官郭望年均請比照謀叛者斬律擬斬立決范小黑因藉回民滋事起意糾眾持械搶掠回寨以致同夥殺死回民多命實屬兇暴眾著合依糧船水手夥眾十人以上持械搶奪爲首照強盜律治罪強盜已行但得財者斬

律擬斬立決張小沅聽糾入夥殺傷回民各一人復聽從中途奪犯應請從重照搶奪殺人者斬立決例擬斬立決當此彈壓漢回翦除外匪之際該犯等未便稽誅臣等於審明後卽恭請王命飭委臬司曹泰署督標中軍副將福陞將該犯董老官郭望年張小老李春有范小黑張小沅六名綁赴市曹卽行處斬並傳首犯事地方梟示使匪類聞風知儆馬庭汶馬富呂會原訊止受雇服役尙無隨同燒搶及抗拒官兵情事應

請於郭望年等斬罪上量減一等從重發新疆
給官兵為奴仍各照例刺字馬庭汶馬富係屬
回民照例調發案係比照辦理各犯家屬財產
請免緣坐查抄逸犯馬老四張九和等並范小
黑之子范小幅生是否已被官兵格殺抑尚在
逃仍飭地方官確查嚴緝毋任漏網黑臉馬五
等業已格殺應毋庸議至張五公登等命案容
臣程霽采另行審擬具

題永昌緬甯雲州善後諸事現俱次第辦理地方

安堵如常合併附陳除全案供招咨部外所有
審明辦理緣由 臣等謹合詞繕摺具

奏伏乞

皇上聖鑒敕部核覆施行謹

奏

附審辦回民丁燦庭京控案片

再滇省迤西一帶漢回近日情形臣等正在繕

片縷陳冀以仰紓

宸念適承准軍機大臣字寄道光二十七年七月初

二日奉

上諭本日據都察院奏雲南回民丁燦庭等控告香
匪串謀滅殺無辜一摺已明降諭旨交林則徐等
審辦矣此案控關奸匪挾讎尋衅串謀倡亂被害
至一萬餘命之多如果屬實必須徹底根究水落

石出席足以服難民之心而除地方之害林則徐程喬采甫經到任無所用其回護著卽平心研鞫毋枉毋縱務將棍徒會匪嚴行查禁首惡各犯從重懲辦以紓積忿而快人心儻係從前辦理不善亦應據實平反奏明辦理不得因案已將就了結顛預塞責遂將萬餘人之屈抑鬱而不伸代人受過已屬不可況數萬生靈之沈冤身爲大吏者竟置之不問耶凜之慎之原呈著鈔給閱看將此諭令知之欽此臣等跪誦之下仰見

聖上軫念生靈務伸冤抑再三尋繹欽凜同深除俟回民丁燦庭等由部咨解到滇提同人證遵

旨平心研鞫不敢將就顛預外伏查永昌順甯緬甯

雲州一帶漢回節次構衅已越兩年臣程喬采

甫於本年四月間到任臣林則徐係於六月間

始到誠如

聖諭無所用其回護但本未躬親其事則原委未易深知是以於未奉

諭旨之前卽無時不明查暗訪並恐先前在事各文

武不免意存掩飾難以確究真情因查迤西道
王發越係於本年三月始抵新任當將善後事
宜責成妥辦並確查節次讎殺根由又以普洱
府同知耿麟從未經手該處軍務委令署理順
甯府篆卽與新派之委員文山縣知縣陸葆一
同密察情形據實稟覆疊接該道等來稟以目
下彈壓巡防倍加嚴緊尙無別起衅端惟報復
之心彼此均不能泯緣漢回積讎已久累世各
不相能溯查道光元年十三年十九年皆有

奏辦兩造械鬪焚殺多命之案第尙不至如此次
之甚彼時回民亦曾赴京疊控有卷可稽就赴
訴之一事而言則原告無非理直被告無非理
曲剖斷似極不難而統全案之原委而言則此
造直中有曲彼造曲中有直糾纏實爲不了蓋
一讎卽有一報而所報偏非所讎崑岡之玉石
俱焚城門之池魚殃及兇頑煽毒而良善受災
事之不平固莫有甚於此者然欲按名伸理而
法又有時而窮緣漢回彼此報復皆起於倉猝

之間往往因游匪外來遂成烏合之勢回匪合則漢村倏爲灰燼漢匪合則回寨立見摧殘人多勢亂之時被殺被燒者先已魂驚魄散卽起死者而問其孰殺亦復不能指明又何從爲之搜捕惟訪有匪類卽拏拏有匪類卽辦則兇手自在其中然欲訊其所殺何人彼亦諉諸不識姓名而不能指實此辦法所以綦難也查前此節次用兵皆稱剿辦回匪而未嘗及漢民者緣回眾先有擄禁官弁戕害將備劫放重囚抗拒

官兵等事是以向其攻剿而漢民中之匪類雖於回民混殺亂搶究尙不敢抗拒官兵彼回民見官兵剿回則以爲助漢而漢民見官吏殺回不盡又以爲助回無非只顧私讎而不知官法前蒙

發下李星沅密片亦云回漢無不怨官者職是故耳卽如丁燦庭等現在京控詞中所訴之冤與臣等衙門所接回呈大意亦略相似其最稱冤屈者係指前年九月初二夜永昌七哨漢民將城

內回民男婦老幼概行擅殺之事雖其所呈八千餘丁口之數核與賀長齡原奏永昌城內本有住家回民四千餘人之語不符卽道府廳縣及委員前後所稟亦均無八千餘人之多除再由_臣等細查以期覈明實數外卽就四千餘人而言亦幾於全無遺類是該處七哨漢民之兇橫慘毒實屬駭人聽聞總緣永昌一帶距省窻遠蠻野成風向有鄉民私設牛叢火竿以禦盜賊偵獲一匪卽任意陵虐致死並不報官原呈

所稱道光十三年間棍等活埋民命知縣查究被圍知府親往救解反被勒結等情雖現在查無案據而所指未必無因迹其恃眾逞兇歷經禁止不悛甚堪髮指然當回漢互爭之際無不豕突狼奔地方官惟激變是虞一時力難禁止由於威約之漸以致太阿倒持言之實深憤懣自有永昌擅殺之事而讎衅愈結愈深遂致不可收拾案查原任督_臣賀長齡於二十五年十二月將該處漢民萬林桂等照光棍例斬決又

於二十六年七月將漢民楊老九等照殺一家
二命例斬梟此皆七哨之亂民均經

奏辦有案其辦理不善之道員羅天池署知府恒
文等亦經查明參奏迨李星沅接任又將羅天
池奏請永不敘用亦無非因永昌漢民擅行殘
殺不能阻止之故在回民仍以此等匪類懲辦
尙少難令甘心每以縱匪殺良歸咎於官此誠
無辭以解然謂官有助漢滅回之見則是已甚
其辭觀於焚殺漢民之回匪官亦未嘗一一究

辦是謂之無能則可謂之偏護則未必然漢民
一面之辭本不免於失實況其所切齒者在九
月初二之事亦思初二以前與初二以後回眾
之兇橫何嘗在情理之中以臣等訪聞此案自
二十五年四月閒因回民在板橋唱曲譏笑漢
民起衅漢民打毀清真寺業已調處賠銀而回
民張世賢丁泳年等尙復糾聚多人疊撲板橋
不服彈壓先將漢人張占魁殺斃是月內漢民
三次鬪敗被燒樊家屯窰門口二寨官兵赴援

亦被拒傷迨七月間外回聚於猛庭者甚眾乃
又進攻思母車寨燒枯柯街及陶家寨又燒大
田街攻丙麻世職高朗死之都司楊朝勳守備
潘惠揚及兵丁百餘人俱被該回擄去此皆九
月初二以前回民逞兇之事卽丁燦庭等現詞
亦自認燒搶枯柯等處戕傷官弁並在蓮花寺
擄官擄兵各情而以難回誤罪四字巧自掩飾
實不知其欲蓋彌彰也至九月初二以後則該
回與官兵接仗於永昌城外之小松寨游擊朱

日恭死之其燒燬漢民村庄亦復指不勝屈迨
二十六年春間回匪黃巴巴復經傳帖聚眾數
千人在大了口搶客銀四千八百餘兩燒順甯
之江橋攻永昌之飛石口又在永昌官坡接仗
致千總趙發元外委楊廷佐都司繆志林把總
趙得和先後陣亡四五月間則又撲營於大麥
地接仗於烏鴉河都司韋成喜守備嚴方訓把
總解鏗金鼇皆死之維時回眾攻右甸城搶五
里寨復有竄赴蒙化將南澗巡檢砍傷者九月

林文忠公政書卷一
間該回逃犯馬嶮海與海老陝等又糾黨至緬甯聲稱報復十九年互鬪之讎燒殺擄搶爲日甚久其雲州之回又將出決絞犯打奪二名至十二月間雲州街道十九條漢民房屋均被回眾燒燬計三千數百間並遍燒猛郎等漢寨三十餘處官兵趕往剿辦至本年正月內甫得息事以上各情又皆在前年九月初二以後該回民等呈內絕不敘及其爲諱匿可知在滇省漢人紳庶咸云回民之殺漢民前後統算實數倍

於漢之殺回_臣等本未目覩情形無從燭照數計惟節次蔓延之大概不敢不詳細訪查故日就赴訴之一事而言剖斷似極不難而統全案之原委而言糾纏實爲不了也_臣林則徐到任之後體察情形與_臣程喬采備細熟商此時斷不可再行用兵致濫殺而轉滋藉口卽緝拏匪類亦須先除外匪而內匪始可漸清所謂外匪者本係無籍游民自稱爲回而未必真回自稱爲漢而未必真漢何處搶殺卽隨何處助兇此

等匪徒現在拏到卽辦並處處嚴查保甲務使無地容身其所謂內匪者如漢回同壤而居安分者卽爲良生事者卽爲匪若必一時窮治追溯搜查則查漢而漢人卽目爲護回查回而回人又目爲護漢漢回各執一說分辯不清治絲而棼終非了局臣等竊謂目前所最亟者在彈壓之使不妄動化導之使不互疑是以首飭文武將永昌順甯等處無論絕產逃產官爲悉數清查無論漢民回民官爲設法招復漢回中各

有紳衿耆宿以及掌教頭人責令於本處同類之中自相約束又令各具互結以回保漢以漢保回永禁侵陵務敦和睦現有數處善良紳士已自議立章程交相保護臣等卽先給予獎賞以樹風聲不日將屆秋收先須杜其聚眾搶割之習故於緊要處所皆須多留兵弁防範稽查仍嚴飭帶兵各員妥爲約束不得藉端生事一面將以上辦法剴切示諭與漢回相見以心未知成效果否能臻惟有勉竭愚誠冀相感動至

於棍徒首惡尤在不動聲色嚴密兜擒斷不敢
姑息畏難致令養癰成患除控案容_臣等確訊

另

奏外所有現辦情形謹先附片密陳伏乞

聖鑒謹

奏

審擬湯丹廠漢回互鬪各犯摺

奏爲審明湯丹廠漢回挾嫌互鬪致鬪回民多命
燒屍燬房獲犯分別按例定擬恭摺奏祈

聖鑒事竊據署東川府知府李德生稟報湯丹廠漢
回互鬪致鬪回民多命燒屍燬房等情當經前
督_臣李星沅兼署巡撫任內飭令查勘嚴拏究
辦旋據署府稟報先後獲犯蘇耀等二十八名
經前督_臣李星沅於奏覆回匪廠匪各情形摺
內陳明

聖鑒在案臣程喬采到任後一面嚴飭剿拏逸匪一面飭將現獲各犯分起解省審辦茲據委員雲南府桑春榮等審明由按察使普泰議擬招解前來臣等提犯親鞫緣已死漢民倖坤發羅起潰及現獲之任連甲杜潰阮汶詳李小四王士銀任東姚亭潰張彩張添幅李萬蘇耀阮潮王呂珍詳胡中潰戚小二王潮有潘趕年潘啞吧趙端工羅起灤羅起沅蕭玉淋楊受淋與已死回民馬四銅錘及現獲之馬成潰馬石詳桂小

蘇馬得亮馬二草包均係巧家所屬湯丹廠住人已獲漢民許成孝籍隸湖南武崗州寄居湯丹廠充當客長回民清真寺後向有泉水歷係漢回公共取用道光二十六年十二月間因天時晴旱馬四銅錘等將水攔堵不准漢民挑取倖坤發等理論仍照舊規漢回因此未睦是月二十八日漢民蘇耀赴廠賣糖回民馬石詳向賒不允互相爭吵馬石詳之祖馬成潰祖護邀允桂小蘇馬得亮馬二草包並在逃之回民白

添發桂小鞍各持棍趕往馬成潰喝令桂小蘇將蘇耀拖翻棍傷兩臂膊兩股漢民趙添發杜蔭沅攏勸馬石詳毆傷趙添發胸膛馬得亮馬二草包等亦將杜蔭沅毆傷各散蘇耀向倖坤發訴述倖坤發許俟開年再爲理講二十七年正月十三日倖坤發令羅起潰往邀馬成潰等前往評理適馬四銅錘在彼向斤多事羅起潰轉回告知倖坤發因回民遇事逞強起意糾毆洩忿遂向呂珍詳許成孝阮潮玉蘇耀商允倖

坤發令以回民阻水欺漢之言傳播鬪眾分投糾約呂珍詳等其糾得漢民羅起潰任連甲杜潰阮汶詳李小四王士銀任東姚亭潰李萬胡中潰戚小二王潮有潘趕年潘啞吧趙端工羅起滌羅起沅蕭玉淋楊受淋及在逃之呂小平春呂大眼睛許小老劉四鍋頭楊花松陳七劉刁三徐老五等二十七人倖坤發亦糾約不識姓名漢民三十餘人呂小平春等又轉糾得不識姓名漢民二十餘人其八十餘人在禹王宮

會齊馬四銅錘聞知亦聚集回民桂小蘇馬得
亮馬二草包及在逃之白添發桂小鞍馬七馬
二花馬三存保馬老六張幅銀馬占鼇馬連沅
馬有淋馬有受馬大話張小五張老二白小喜
陳鋤刀並已死之馬小發甲馬小詳馬汶玉馬
占春馬洪發馬丁花子馬小萇受馬四塊瓦白
小八三馬正保馬尙平陳姓等三十一人並白
添發等所糾之不識姓名回民二十餘人其五
十餘人在清真寺防禦十八日上午倖坤發率

眾各持刀矛至清真寺地方喊罵馬四銅錘亦
率眾執持刀標從寺內趕出彼此互鬪倖坤發
將馬四銅錘並馬小發甲一併截傷羅起潰將
馬小詳截傷白添發馬汶玉趕攏亦各將倖坤
發羅起潰截傷姚亭潰亦將馬汶玉截傷均各
倒地維時馬占春馬洪發馬丁花子陳姓並不
識姓名回民二人各向任連甲杜潰阮汶詳李
小四王士銀任東爭鬪被任連甲等各自截傷
亦俱跌地與馬四銅錘等均各斃命李萬用矛

林文忠公政書 丙集 卷二
截傷不識姓名回民左胎膊該回民逃跑未斃
尚有回民馬小萇受馬四塊瓦馬小八三馬正
係馬尙平及不識姓名回民六人被何人致傷
身死彼時人眾勢雜各犯看視不明未能供指
餘回因力難抵敵往後退跑被漢民喊追倉猝
復自行跌岩斃命八九人呂珍詳許成孝阮潮
玉蘇耀胡中潰戚小二王潮有潘趕年潘啞吧
趙端工羅起濼羅起沅蕭玉淋揚受淋等均止
在後助勢並未傷人嗣漢民等分路走散呂小

平春復帶同不識姓名漢民十餘人並邀張彩
張添幅陳七分追逃走各回呂小平春與張彩
路經新店房有回民何石甲等上前喊拏張彩
跑走何石甲之子何小科拔刀趕砍張彩轉身
奪獲回截其胷臆殞命張添幅與陳七行至山
神廟被回民楊興發等攔住欲毆張添幅分辨
楊興發拔刀撲砍張添幅亦拔刀抵截楊興發
閃避適其幼弟楊小老走攏致被張添幅誤傷
肚腹致斃張彩張添幅當各逃走呂小平春陳

七復帶人各將何石甲楊興發房屋打毀呂小平春因傷斃回民多命起意燒屍滅迹希圖掩飾遂令李小四胡中潰徐老五並不識姓名漢民六人將各屍身檢齊共三十餘具連夜背至清真寺院內搬取堆存柴草點燃將各屍燒燬因火星被風吹落屋內草堆致將寺屋燃燒時附近回民均因畏事移避近寺房屋亦被燃燒多間此漢回挾嫌互鬪傷斃回民多命燒屍燬房之原委也旋據獲犯解省經委員等審明由

臬司招解_臣等親提嚴鞫各供前情不諱_臣等以蘇耀等被馬成潰等毆傷係屬一時爭角何以倖坤發事後扛幫輒爲鬪眾聚鬪恐另有起衅別情並被糾被殺漢回亦恐不止此數其燬屍燒房是否實係呂小平春起意有無因該犯在逃扶同狡飾再三究詰僉供倖坤發原因邀馬成潰等理講被馬四銅錘村斥挾忿並因回民阻水與漢民本有未睦是以聽糾助毆委無另起釁端至被糾漢民被殺回民實止此數其

燒屍滅迹委係呂小平春起意房屋係被延燒
並非故意燒燬不敢隱匿各供不移案無遁飾
查例載廣東等省糾眾互毆之案如審係械鬪
讎殺糾眾至四十人以上致斃彼造十命以上
首犯擬斬立決梟示其隨從下手傷重致死應
行擬抵者均各依本律例擬抵傷人及未傷人
者亦各按本律例分別治罪至彼造倉猝邀人
抵禦並非有心械鬪者仍照其毆本例科罪又
律載同謀共毆人致死下手致命傷重者絞監

候餘人杖一百又鬪毆殺人者不問手足他物
金刃並絞監候又因鬪毆而誤殺旁人者以鬪
殺論又例載回民結夥三人以上共毆之犯但
有一人執持器械者不分首從發雲貴兩廣極
邊烟瘴充軍又聚眾執持兇器傷人發邊遠充
軍又糾眾互毆案內餘人如有輾轉糾人數至
五人以上者無論曾否傷人即照原謀律杖一
百流三千里又毆故殺人案內殘毀死屍其聽
從抬棄之人照棄屍爲從律杖一百徒三年各

等語此案漢民倖坤發因蘇耀被回民馬石詳
賒糖爭鬪馬成潰糾人將蘇耀毆傷事後往邀
理論並挾馬四銅錘村斥之嫌起意糾約八十
餘人持械互鬪致斃回民三十餘命該犯鬪殺
馬四銅錘馬小發甲二人實屬首惡非尋常互
毆可比例無治罪明文應比照廣東等省械鬪
讎殺糾眾至四十人以上致斃彼造十命以上
者首犯斬決梟示例擬斬立決梟示該犯已當
場被殺仍照例戮屍傳首犯事地方示眾羅起

潰任連甲杜潰阮汶詳李小四王士銀任東姚
亭潰各自鬪殺回民馬小詳馬占春馬洪發馬
丁花子陳姓馬汶玉並不識姓名回民等各一
命應仍照本律問擬除羅起潰已被戮斃應毋
庸議李小四聽從毀屍輕罪不議外任連甲杜
潰阮汶詳李小四王士銀任東姚亭潰均各依
鬪毆殺人者不問手足他物金刃並絞監候律
擬絞監候第聚眾持械非同尋常鬪毆且回民
之傷斃多命皆由該犯等助鬪濟惡所致情節

較重現當彈壓漢回滋事必須執法持平將兇
暴大加懲創此等鬪殺回民多命之犯按律俱
應情實未便日久稽誅致長囂陵惡習所有任
連甲等七犯應請

旨加擬立決俾各匪咸知儆戒亦足以折服回眾之
心漢民張彩張添幅於倖坤發等互鬪之時先
未到場後經呂小平春邀追逃走各回張彩被
回民何石甲等喊拏爭鬪致將何小科戳傷身
死應照鬪毆殺人律擬絞監候張添幅亦因被

回民楊興發等攔毆爭鬧致誤傷楊小老身死
應照因鬪毆而誤殺旁人以鬪殺論鬪殺者絞
監候律擬絞監候秋後處決漢民李萬聽糾用
矛戳傷不識姓名回民應照聚眾執持兇器傷
人例發邊遠充軍漢民呂珍詳許成孝阮潮玉
蘇耀訊止聽糾助勢並未傷人惟各輾轉糾約
五人以上應照互鬪案內餘人如有輾轉糾人
數至五人以上無論曾否傷人即照原謀律杖
一百流三千里例各杖一百流三千里內呂珍

詳許成孝係在廠充當係長客長于倖坤發糾
眾爭鬪之時並不力爲勸阻輒聽從鬩眾糾約
致釀多命應請從重發新疆地方當差回民桂
小蘇等聽從馬四銅錘糾往抵禦並未傷人惟
先與回民馬得亮馬二草包馬石詳等聽從馬
成潰結夥持械將蘇耀等毆傷內馬成潰與馬
石詳等雖祖孫其犯惟係侵損於人應以凡人
首從論除馬成潰已在監病故外桂小蘇馬得
亮馬二草包馬石詳均應照回民結夥三人以

上其毆之犯但有一人執持器械者不分首從
發雲貴兩廣極邊烟瘴充軍例發雲貴兩廣極
邊烟瘴充軍與呂珍詳等各犯分別發配折責
安置漢民胡中潰聽糾助勢並未傷人惟事後
聽從呂小平春燒屍滅迹應照毆故殺人案內
殘毀死屍聽從擡棄之人照棄屍爲從律杖一
百徒三年例杖一百徒三年定地充徒折責拘
役限滿詳釋漢民戚小二王潮有潘趕年潘啞
吧趙端工羅起濼羅起沅蕭玉淋楊受淋訊止

在場助勢並未幫毆均應照其毆餘人律杖一百俱酌加枷號兩箇月滿日折責發落以示懲儆回民馬四銅錘糾眾互鬪並馬汶玉截斃人命均罪有應得已各被殺身死俱毋庸議避害回民及被延燒回房已飭據該府廳妥爲招撫給資苦蓋均無失所該處泉水飭令仍照舊規漢回公同取用不得爭競廠地現俱靜謐除飭令該府廳隨時稽查約束務使漢回日久相安毋得稍滋釁隙並嚴緝逸犯呂小平春等務獲

究辦並全案供招咨部外謹將審明定擬緣由
合詞恭摺具

奏伏乞

皇上聖鑒勅部核覆施行謹

奏

姚州白井漢回互鬪大概情形摺

奏為姚州與白鹽井相連地方漢回尋釁燒殺業已彈壓解散現經獲犯審究並查勘辦理情形

恭摺奏祈

聖鑒事竊查姚州地方漢回雜處白鹽井在其境內該州北界白塔街一帶係為赴井通衢本年八月十九日據署楚雄府寶俊楚雄協副將尙宗慶轉據署姚州知州咸孚稟報八月十三日漢民王開汶等因回民沙汶英藏頓軍器盤查爭

開致有殺傷漢回因此構衅于十五等日在白
塔街等村互相燒殺當經會訊親往查辦稟請
派調官兵彈壓並據白鹽井提舉李承基稟報
聞有回匪欲與井民尋衅該井爲辦課重地恐
被騷擾請兵防堵各等情臣等當卽檄飭楚雄
府協隨帶弁兵并飭甫經出省之委員麗江府
裴驄順道前赴該處並檄調新授鶴麗鎮總兵
音德布護武定營參將王濤就近酌帶弁兵馳
往會同彈壓去後嗣據該鎮府協等查稟先經

府協前往彈壓飭令各掌教頭人曉以利害遍
爲傳諭並聞官兵前至遂經解散息爭惟肇衅
首要及逞兇各匪俱已竄匿現在嚴密緝拏務

獲究辦

臣林則徐於

奏委重綸署理普洱鎮總兵摺內業將姚州漢回
衅爭已息鶴麗鎮總兵音德布應須會同緝犯
尙駐姚州緣由陳明

聖鑒一面飭令該鎮府等確查起衅根由並漢回民
被燒房屋傷斃人數據實具報嚴拏首要各犯

認真審辦並將被害漢回妥為撫卹勿任失所
茲據該鎮府暨委員等稟稱查因姚州回民喫
三竅馬幟良喫伊麼等諭知白井竈長漢民羅
晴川家道殷實商謀糾搶私將器械寄藏素好
之張汝淮陳典家內因在喫小雙茶鋪漏洩其
事被井民聞知報經該提舉僉差將喫三竅並
張汝淮陳典等拏獲起獲刀械等件送署馬幟
良逃逸起意糾約回民報復即令馬小班等運
送器械於八月十三日至白塔街回民沙汶英

家藏歇經該處漢民王開汶盤問爭鬧沙汶英
之戚喫小老將王開汶截傷身死漢民高添佑
馬致禾等前往理論沙汶英恃強辱罵致相爭
鬪高添佑等將喫小老截斃並傷斃沙汶英家
男女九命及不識姓名回民二人將其房屋打
毀回民馬幟良等漢民高添佑等因此構衅附
近漢回亦各隨聲附和于十五等日互相燒殺
查勘白塔街洋派北關官屯等村漢民被燒房
屋共二千六百八十餘間山腳官庄二村回民

被燒房屋其二百六十餘間漢民查報傷斃男
女三百二十七丁口內經獲屍驗明被殺被燒
及跌巖落水致斃者一百三十四丁口回民查
報傷斃男女六十五丁口內經獲屍驗明被殺
被燒致斃者二十二丁口此外並無屍身是否
尚有逃亡抑係查報不實現復逐處清查俟得
確數再行具報並聞白井關外回民亦有燒殺
之事該處僅住回民十餘戶均已搬避未據親
屬投報究被何人殺害致死幾人屍棄何處現

亦確切查訪俟得有端倪起屍驗辦計白井姚
州楚雄縣先後拏獲滋事回漢各匪僣三竅張
汝淮陳典馬幘良僣有盈馬春漢僣金聶倫馬
成名僣汶盈僣老孤馬玉山蕭小定僣新成馬
致禾胡小萬春李映祥僣世滌僣世恩僣有功
楊旭僣小雙等二十二名並案內要犯僣伊麼
因指拏黨匪僣有盈自圖減罪致被僣有盈砍
截斃命驗明屬實惟各犯供多狡展逸匪尙未
全獲現仍上緊偵緝嚴審務得確情錄供詳辦

被害者均已按戶撫恤逃避者陸續招徠安集
不致失所等情前來臣等查該漢回等因口角
衅爭輒敢糾眾互相燒殺以致傷斃多命燒燬
房屋多間實屬逞兇不法現查漢民被傷人命
多於回民十分之八漢民被燒房屋亦多於回
民十分之九雖其中互有曲直而回民之强悍
爲尤甚應將兩造首惡黨匪嚴行懲辦以昭炯
戒不敢稍任輕縱除飭將現獲各犯研審確供
並上緊嚴緝逸犯按名務獲歸案審辦另行按

擬具

奏外現在姚州地方俱已安靜白井照常煎銷仍
飭該鎮府及委員等妥爲查辦務使漢回日久
相安不得再滋釁隙所有武定營弁兵已徹歸
伍其音德布隨帶弁兵俟緝匪事竣亦卽撤回
謹將查勘辦理大概情形先行合詞恭摺具

奏伏乞

皇上聖鑒訓示謹

奏

甄別鹽提舉州縣各員摺

奏為甄別昏庸謬妄及難勝民社各員請
旨分別革職勒休改教以飭官方恭摺奏祈
聖鑒事竊維立政之道察吏為先如其措置乖方識
見適形其闇汶聰明誤用心術每中於回邪又
或相率因循則公務必多廢弛臣等於接見屬
員時無不留心考察臣林則徐前於校閱營伍
之便並經到處訪聞據該管府州密稟前來臣
等督同司道詳加體訪查有白鹽井提舉李承

林文忠公奏稿
雲貴奏稿

其人本平庸井地係其專管平時不理民事該民以煎鹽爲業家多殷實回匪因而恐嚇詐財若井民喊告到官卽爲分別查拏剖斷曲直立加懲創以儆其餘回匪定生畏懼乃聽井民膚受之愬輒令以原執被遂至倚官勢而報私仇追回民益肆囂陵卽架以謀逆重情請兵救護臣等就近發兵前往彈壓業經解散該提舉竟欲將回民剿殺殆盡妄作條陳又復私僱外來無業遊民作爲練丁幾至激成事變種種荒謬

罔知事體之重輕除案犯交府州拏解研審究懲另摺奏

聞外應請將該提舉李承基先行革職如查有別項情事及虧短經徵課項再行據實嚴參又嵩明州知州黃際昌在任有年性耽麴蘖平時專恃官親辦事故人皆得分肥前次領運京銅竟至短交十餘萬斤現在查照例限追繳若仍令其回任勢必至虧倉庫錢糧應卽勒令休致又署邱北縣知縣黎崇基才屬中平該縣盜賊滋多

緝捕未能得力該署令性情疏懶難期振刷精神又署師宗縣知縣陳溶壤地與邱北毘連民夷雜處訟獄繁興該署令聽斷不勤捕務亦欠起色查黎崇基係進士出身現已准補麗江縣尚未令其赴任陳溶由拔貢教習期滿分發來滇補缺有需時日該二員年力強壯文理尚優應請均以教職改補又候補直隸州州判山毓柏向多嗜好心地不醇舉動尤為躁妄曾經署理廳縣不洽輿情實屬聲名狼籍未便既往不

咎稍事姑容應請卽行革職謹就_臣等見聞所及核實

奏參此外查有庸劣之員再行糾劾斷不敢自甘徇隱見好屬員有負邊圻

委任所遺白鹽井提舉員缺例應在外陞調麗江縣缺滇省現有應補人員容_臣等照例請補合併陳明所有甄別緣由謹合詞恭摺具

奏伏祈

皇上聖鑒訓示謹

奏

飭提永昌京控人證未據報解情形片

再臣等因永昌漢回久挾夙讎互相殘殺終非了局要在彈壓之使不妄動化導之使不互疑是以仍留鎮將大員帶領未徹官兵駐彼防範竝飭迤西道親歷永順一帶督同府縣曉諭紳衿掌教務敦和睦永禁侵陵疊次刊發告示諄諄開導令其各具切結以漢保回以回保漢又爲之清釐田產招復流亡使知相安則樂利有餘相讎則身家兩失其紳衿掌教等亦卽轉相

勸戒議立條規不獨具結呈官且各書和約同誓於神以明其無反覆臣等接據文武稟報亦卽優加獎賞以誘其悔過遷善之誠竊冀自茲以後兵革可以不興卽留防各兵亦惟盡此殘冬皆可撤回歸伍惟先有兩起回民京控欽奉諭旨交臣等審辦其原告丁燦廷等一起於十月十七日由部咨解到滇又杜文秀等一起亦於十一月初三日咨到應卽飭提被告人證解省以憑質訊惟查原呈所列被證自百餘名至二百

餘名不等人數太多勢難盡行提解當經札飭該道府等分別首要次要其於控案情節無甚關係者祇須就地取供彙送覈辦惟被回民呈內指係香匪串謀滅殺無辜者不能不提至省城與原告質對虛實乃歷今多日總未解到雖因永昌距省窵遠難免遷延而訪聞該處漢民業已糾聚匪徒將應解之人意圖抗匿藉稱本年正月內該處有問擬軍罪之張杰萬重二名由官起解被回匪攔路殺死此次若解赴省亦

必在途被害不敢起身該道等諭以揀派文武幹員多帶兵役沿途護送務保無虞開導再三而哨民總不願解查該處爲保山縣所轄地分七哨南三哨尙可理喻其北四哨强悍成風就中金鷄板橋二哨尤多匪徒燒香結會風聞十餘年來往往挾讎擅殺平民匿不報官若官爲查問則沿村吹號糾人每欲恃眾困辱官長地方官恐急則生變致蹈辦理不善之愆因而隱忍彌縫但冀事端寢息養癰本非一日積習殊

可深憂前者漢回構釁猶祇民與民爲讎今明知京控兩案奉

旨交審而膽敢糾約庇匿意欲抗官此風實不可長惟該道府均未將情形具稟臣等馳系轉深現又諳飭妥爲曉諭設法提解固不可操之過促致滋決裂之虞亦不得匿不稟聞轉釀邊隅之患所有提解控案未能就緒情形臣等謹據實附片奏

聞伏乞

聖鑒謹

奏

籌辦永昌哨匪起程日期摺

奏為保山縣七哨匪徒打奪解省人證隨又焚燒
縣署劫放獄囚殘殺城內回民及在官丁役鎮
道府縣現俱被困在城道路梗塞文報沈滯不
得不調兵剿辦臣林則徐擬赴大理府就近調
度仍先出示散其黨羽以冀首要各犯作速就
擒地方仍歸綏靜謹將籌辦情形恭摺奏祈

聖鑒事竊臣等前因永昌回民兩起京控欽奉

諭旨交審飭提被告人證解省日久未見解到訪聞

林文忠公政書

丙集

雲貴奏稿

四

本朝八公正書 卷三
該處漢民欲將應解之人抗匿不解而未據該
道府具稟永昌距省十九站當又疊札飭查並
將所訪大略情形於上年十二月十六日合詞
附片具

奏在案嗣經查據保山鄰境各文武先後探報十
一月二十九日永昌府縣會營帶兵押解京控
案內被證至離城四十里之官坡被保山哨民
劫去次日又擁入城內焚燒保山縣署監犯盡
行放出先經招復之回民現被搜殺無存沿途

哨民聚集阻塞道路搜檢公文凡有關係之件
均不能遞送江橋板片已被折去各等情迨十
二月二十五日始接據該處鎮道及府縣營員
會稟則稱十二月初一日起解京控人證周曰
庠等九名行至官坡因聞前途有回匪聚眾圖
搶該被證等恐被殺害哭求緩解是日街期眾
民紛紛跪求因人多擁擠周曰庠等走散旋報
城內回民放火延燒縣署監獄漢民救火匪回
齊出搶殺被兵練格殺多命監犯亦乘間逸出

等語臣等查保山城內文報業已多日不通而
此次鎮道府縣等會稟忽然同日遞到其詞又
皆畫一而核與鄰境文武所報情節大相懸殊
此中愈多疑竇當復疊遣弁兵差役分投飛探
竝查有由保山逃出之腳夫數人陸續傳訊始
知該處七哨匪徒不下數十萬人每聚眾時用
牛角一吹無不蜂擁而至此次打奪京控人證
實係十一月二十九日之事其時文武帶領兵
役雖有數百名無如哨匪累萬趕來鎗礮亂放

有騰越鎮標外委胡恩榮左臂被礮子打穿存
亡未卜各文員乘坐之轎俱被打碎武員軍械
馬匹被奪一空其次日卽係十二月初一日各
文武正在會議辦理此案未開城門忽有無數
哨匪越城擁進聲稱搜殺回匪查保山城內有
甫經由官招復之回民百餘人逃赴縣署聲喊
救命該哨匪遂追趕至縣一齊放火將縣署全
行燒燬回民盡行殺斃竝有騰越廳回民來府
應試亦被殺多名又以各衙門及公館有回子

藏匿恃眾搜殺竝將迤西道之家丁誤認爲回人殺死二名其赴縣監放囚之時有縣役張五攔阻亦被殺害所有在城文武隨帶丁役無多其永昌協兵丁亦係該處之人勢難恃其捍衛自鎮道府縣以及各委員皆被困窘在城每日市糧限數出糴該處有瀾滄江一道爲省城及東路各屬赴永必由之路該哨匪將江橋板片折去並聚多人把守如有公文遞過哨匪卽攔截折看立時撕毀永平縣遣遞公文差役亦被

殺死二人其餘各處隘口均被匪黨把守無人得入是以_臣等節次飭查各文件俱無下落其忽然遞省之會稟卽係哨匪捏就情詞逼令書吏繕寫勒官用印發申而其實在真情除鄰境探報及_臣等查訊之外全不得信查該處哨匪如此不法雖尙未聞戕害各官而抗拒勒逼情形卽與反叛何異推其藐法之由聞自道光十三年間該處設立牛叢挾仇擅殺經署永昌府陳錫熊署保山縣吳繩先後親往查禁均被圍

困窘辱勒令寫立不辦字據用印給付爲憑始
行放出其事竟已寢息嗣後該處之民直皆目
無官長前兩年該哨與回結衅互相焚殺厥罪
惟均祇因回匪有拒敵大兵戕官劫囚等事是
以用兵專爲剿回而設其哨民尙無抗官情罪
故未加兵今逆情如此昭彰直欲負隅梗化若
再化大爲小不獨永昌竟成域外而凡漢回匪
類孰不恃居邊遠羣起效尤臣等與司道各員
再三商酌泣查知回民現亦四處糾黨各圖報

復若再互相殘殺禍患更必蔓延須得多調重
兵方足以示彈壓而資剿辦查七哨有數十萬
之眾兵力單弱深恐損威其永昌順雲一帶之
兵旣因要隘甚多難以分撥且須防其勾結必
得另調他處之兵是以札商提臣榮玉材先於
提標及維西永北鶴麗劍川景蒙等營調兵約
二千餘名爲前隊一起交榮玉材帶領先赴永
平駐劄相機前進又調省標六營及曲昌開化
各兵約二千名爲中隊一起赴大理聽候調遣

又調昭通東川兵七百名令昭通鎮劉定選統帶竝調貴州提標及威甯安義二鎮兵共一千二百名交安義鎮總兵秦鍾英統帶爲後路一起陸續進發以上約調兵六千名皆由東路前往其永昌以西有騰越龍鄰一鎮一協之兵亦經酌調二千名由西路前進以期夾擊復查歷次迤西用兵無不添僱勇練該處山川險阻箐密林深客兵路徑生疏易滋迷誤須用慣習山路之土民夷練或指引嚮導或分截要隘兼杜

匪徒竄伏以防意外之虞臣等亦已分飭各土司僱備精練竝札該管府營認真挑選以資應用但查永昌之瀾滄江兩岸皆依山爲險路極彎曲江橋一座爲往來咽喉要路今經該匪折去橋板聚眾防守恐此路未易進兵若不得已則各處官兵均須繞道順甯府前進臣等分檄經過各地方預爲佈置已有眉目計各路官兵正月底可以到齊臣林則徐擬於十九日由省起身赴大理府駐劄督辦該處距省城十三站

距永昌六站自可隨時相度機宜分別調度臣
程喬采仍在省城督催各路官兵籌辦糧餉接
濟所有總督衙門日行事件暫委藩司趙光祖
代折代行其緊要事宜仍包封寄至行次由臣
核辦至軍需應用經費查滇省別無閒款可籌
祇得於鹽課項下借動銀十萬兩先行濟用惟
目前哨匪聯爲一氣良莠不分若概予征剿恐
脅從者自知不免亦復相率抵敵礙難辦理是
以臣等先行剴切出示遍貼曉諭以附近各郵

漢民如不敢隨同附和定不概予株連卽先已
被脅勉從者但能悔罪輸誠亦可量邀未減其
心存畏懼不敢始終怙惡須將首要各犯迅速
自行縛獻以正刑誅所有江橋板片亟須照舊
鋪平各處隘口不許阻攔行旅往來文報毋得
截留擄毀被搶軍械作速照數繳還以上各事
如果逐一遵行或可網開一面免致盡數殲除
若仍冥頑不靈罔知利害則大兵一臨惟有痛
加勦洗人皆粉骨碎身地盡犁庭掃穴不能曲

予保全如此大加曉諭庶黨羽可漸解散元惡
易就殲擒臣等惟有極力籌維冀地方速歸安
謐以仰副

聖主綏靖邊隅除莠安良之至意所有查明哨匪滋
事調兵辦理緣由謹合詞恭摺具

奏伏乞

皇上聖鑒訓示再滇省程途遙遠差弁齎摺約須四
十日始能到京臣等恐塵

聖懷嗣後軍務之摺即請由馬上飛遞合併聲明謹

奏

生擒彌渡匪犯審辦摺

奏為彌渡軍營生擒首要重犯審明即行正法餘

犯按例定擬恭摺奏祈

聖鑒事竊照彌渡地方內外匪徒勾結滋事傷官害

民經臣會督提鎮用兵剿辦大獲勝仗除臨陣

殲殺情形已於另摺

奏報外所有官兵在陣前生擒拒敵逆匪及先後

逸出被獲各犯陸續解送到臣者計其一百二

十三名當經飭調大理府知府唐愔培督同署

雲南縣知縣董宗超署賓川州知州李崢嶸暨各委員訊取確供復經臣逐一提審除訊明實未隨同拒敵傷官結會拜盟焚殺搶劫之黃小猥等三十五名分別取保省釋及遞解本籍管束外臣核訊通案眾供此次外來匪徒係四川國民沙金隴沙玉隴漢民古明發爲首本地匪徒係回民麻汝淮麻春融黃中爲首緣彌渡地方爲迤西買賣馬頭常有川陝漢回民人往來販買因地方頗稱富庶往往流連不去易生事

端道光二十七年秋冬間沙金隴沙玉隴弟兄與古明發等先後販彌渡雜貨生理遂與本地素稱強梁之回民麻汝淮等交好十二月間沙金隴等見陝西人喬姓在彌渡開義盛當舖銀錢充積起意訛索終日在鋪吵鬧麻汝淮等遂勸鋪夥李六等出錢買靜陸續詐去錢二百二十千銀二十兩寢事本年正月初九日有川省回民張國幅與軍犯張世保私相賭博爭毆張國幅被張世保戳死報經署彌渡通判林甘源

移明趙州知州周力墉到地驗屍拘獲張世保到官正在研訊詎沙金隴等藉稱死者係其親戚乃被軍犯欺侮遂約川回多人執持刀械於十四日將各軍犯住處搶奪一空該通判會同知州差人禁止沙金隴等卽闖入通判衙門將甫經拘訊之張世保擅行戳死竝另斃在旁軍犯陳亞林一名帶傷四名官差喊拏立時闕散因匪類人眾一時難以就獲其內匪麻汝淮等又起意恐嚇市肆民家聲言四處外來人若不

安頓卽日必被焚搶各戶無不驚懼逐日鳩集銀三百二十兩由麻汝淮等交沙金隴沙玉隴古明發分散夥眾作爲盤纏口許一二日卽各回籍麻汝淮等分其餘利多寡不一乃沙金隴等因見良懦可欺口雖言去實無去志愈圖搜劫城鄉各戶更可捆載而歸猶恐人心不齊起意結盟拜會先與外來客民密約得贓均分又暗邀本地回民麻汝淮等輾轉糾人亦動以利十八日在彌渡北門外之五顯宮燒香結拜歆

木三思公正書 卷三
血飲酒謂之進山其入會之人約分九排皆有
總領曰大爺曰二爺曰五爺曰么大曰滿大曰
滿五曰十爺曰么五曰小老古明發麻汝淮與
沙金隴沙玉隴麻春融黃中均列排首總共六
七百人十九日會畢謂之出山經通判知州訪
知差拏因人眾不敢動手趕緊稟請發兵惟時
北門外鄉民恐被侵擾各自團練保護二十日
該匪等各備馬匹揚言是日起身旋即藉稱四
鄉持械堵截不能前去實則已與盟夥暗定時

刻分隊出搶一時鎗斲刀械紛紛突起戶民動
遭殺害驚惶失措不敢禦敵有李姓一家被搶
銀五千兩陳姓一家被搶銀二千四百兩爲數
最多其餘搶銀自四百餘兩至數十兩不等錢
自百餘千至數千不等該文武在街市禁阻寡
不敵眾致各受傷該匪等遂恃人眾圍攻通判
衙署各官被困署中請兵未到二十一日燒搶
寺坡北甲等處二十二日燒搶陸家賴家等營
二十三日又燒搶阜角馬溪姚期等營共計被

害者十七邨莊至二十四日兵雖未齊而將備
已有到者一面派兵堵禦匪類稍有懼心不敢
再行放火二十八九兩日兵到漸齊其次日提
鎮俱到初二日紮營兜捕初三日併力正攻該
匪恃眾抵拒竭盡晝夜之力殺斬無算生擒復
多此係內外匪徒始而詐擾繼而結拜終而焚
搶戕官害民之一切情形也此次沙金隴一犯
於初三日當場騎馬拒敵經各兵民認明連槍
打落奪獲其馬斬取首級送至大營各邨人眾

來觀齊聲稱快除將該首級懸竿標明示眾外
現所生獲之外匪首犯古明發內匪首犯麻汝
淮二名均已供認起意會商糾眾拜盟復率領
焚搶邨寨殺害多人拒敵官兵各情不諱均屬
首惡應比照凡謀叛不分首從皆斬律加重凌
遲處死惟係比照定罪家屬毋庸緣坐財產亦
免入官稍示區別曾義松劉得畏謝中華陳有
何馬明楊老三趙添成七犯均供認殺人自七
命至二命不等并經拒敵官兵又唐汶星徐兆

近李添朝楊應全李發緒興趙洪順黑正青趙
斯樽馬潮選馬連興王大順侯小六王春陳泳
盛劉思潮李諱劉仍馬成母受復尹小存徐崇
尹時有羅從潰李選揚潘有受二十六犯供認
焚燒邨寨各殺一命俱屬同惡相濟均應擬斬
立決加以梟示馬青山李洪順曾世桂黃明富
李添希楊明陳世汰劉逢春馬保李發春祁永
林張老蔡連沅趙鄭桂楊義隴劉金寶王結馬
信馬沅唐小四高順才徐廣順但意才揚正興

李昭劉定幗二十七犯雖供未經殺人俱已隨
同焚搶邨寨得分贓物均應擬斬立決以上其
犯六十二名悉係情罪重大未便稍稍顯戮臣
於審明後卽恭請

王命飭委大理府知府唐愷培新習營遊擊恒權押
赴犯事地方卽行處決應梟示者傳首示眾以
昭炯戒其獲時受傷較重旋經監斃匪犯八名
內有李泳發楊興順二名殺害多命應行戮屍
一體梟示又楊沅方有潮馬靛青鄧奉茂王保

罄馬小沅祁得陳沅陳聯升馬章馬潰郭遇順
馬仍馬吉桂楊長保李老二官相潮鄒正才十
八犯訊只隨同入會並未焚殺搶奪亦無抗拒
官兵均應照匪黨結拜非依齒序聚至四十人
以上爲從發極邊烟瘴充軍例發極邊烟瘴充
軍係在滇省犯事應請照案發配兩廣安置又
據現犯供稱沙玉隴麻春融黃中三犯已在陣
前殲戮惟屍身未經認明恐難憑信尙須確加
查究如經竄逸尤須查拏務獲不任倖逃法網

至_臣現驛行營未及辦理供招送部_臣開具犯
名清單註明緊要情節恭呈

御覽仍將各犯口供發交臬司彙核詳送撫_臣咨部
備案以符定制再該匪等結會拜盟事起倉猝
地方官查知禁止而寡不敵眾是以稟請發兵
現已剿辦完竣所有失察處分仰懇

天恩從寬邀免謹將訊明辦理緣由繕摺具
奏伏乞

皇上聖鑒謹

奏

續獲彌渡匪犯審辦摺

奏為續獲彌渡滋事逸犯審明定擬竝將重犯卽行正法以示懲儆恭摺奏祈

聖鑒事竊臣前因彌渡地方內外匪徒滋事當卽調

集官兵繼獲首從各犯分別懲辦業經繕摺

奏報竝聲明飭屬查拏逸犯務獲在案臣思除惡

務盡逸犯一名不獲根株一日不清况此案夥

黨多係川陝外來匪徒如閱時稍久誠恐出省

遠颺查緝更難得手隨卽通飭各府廳州縣毋

分畛域勒限上緊偵緝竝於毗連各屬關隘嚴飭認真盤詰務期按名弋獲不任免脫稽誅茲據蒙化賓川姚州雲南等廳州縣陸續拏獲首從各犯其計二十二名解送到臣當飭大理府知府唐愷培督同署太和縣知縣熊家彥署賓川州知州李崢嶸暨各委員訊取確供復經臣飭提親訊據首犯沙玉隴供認與已正法之古明發麻汝淮竝殲斃之沙金隴等起意糾約四川陝西貴州及趙州永北姚州各處漢回結盟

焚搶抗拒官兵殺斃多命乘間逃逸各情歷歷如繪核與古明發麻汝淮等前供悉相脗合復提從犯隔別研訊除陳興順一犯聽從結盟竝未隨同焚搶孫小滌白萬明二犯係事後分贓未經拜盟外其馬六三等十八犯各供認聽糾結盟持械焚劫並有打仗一二次殺斃一二人命至三四命不等臣恐尙有不實不盡復提前獲留禁各犯質認無異再三究詰矢口不移案無遁飾查沙玉隴商同古明發等糾眾拜盟身

爲會首復率領焚搶郵寨殺害多人拒敵官兵
實屬罪大惡極應請比照凡謀叛不分首從皆
斬律加重凌遲處死案係比照問擬應免緣坐
馬六三謝沆沅李阿存周其湮鍾小三楊順六
犯係聽從結盟搶劫得贓拒敵官兵殺斃一二
命至四命不同惡相濟均應擬斬立決加以
梟示王有才劉玉順趙起倡韓成富潘應發張
騰高彭興順宋洪發陳常發胡春華楊啓濬周
澧十二犯雖未經殺人但隨同結盟焚搶得贓

竝抗拒官兵均應擬斬立決以上十八犯俱屬
情罪重大未便稍稽顯戮臣於審明後卽恭請
王命飭委文武員弁將各犯押赴市曹卽行處決以
昭炯戒而快人心應梟示者仍傳首示眾又陳
興順一名訊係聽從結盟並未隨同焚搶應照
匪黨結拜非依齒序聚至四十人以上爲從例
發極邊烟瘴充軍孫小濬白萬明二犯委係事
後分贓未經拜盟應照強盜事後分贓例杖一
百徒三年臣現由大理前赴永昌未及辦理供

招謹開具犯名清單註明情罪恭呈

御覽所有各犯口供仍行發交臬司歸案彙核詳送
撫臣咨部備案至緝獲逸犯各文武均尙認真
容查明首獲協獲與前案一併奏請鼓勵合併
聲明所有續獲逸犯審辦緣由理合恭摺具

奏伏乞

皇上聖鑒謹

奏

